

Ukiup sinnerani aalisartut qaleralinnik saarullinnillu inuutissarsiuteqartut pisassaaruttut, kiisalu aalisakkerivinni qaleralinnik saarullinnillu nioqqutissiorfiusuni sulisut suliassaaruttut, isertitaarutivinneq pissutigalugu inuuniarnermikkut atugarliorluinnalertussat pillugit aaqqiissutaasinnaasunik sunik iliuuseqarsinnaaneq pillugu apeqquteqaat aallavigalugu oqallinnissamik siunnersuut.

(Siumup Inatsisartuni ilaasortaataitai)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Pinngortitap pissusaata allanngornerata malitsigisaanik imaluunniit aalisagartassat aalisareerseqarsimanerisa malitsigisaanik utertualersumik aalisartut, piniartut kiisalu tunisassiorfinni suliffeqartut ajornartorsiulertarnerat pillugu tunngavilersorluakkamik kiisalu naapiffiusinnaasunik ujartuinertalimmik oqallittoqarnissaa Naalakkersuisut kissaatigaat oqaaseqarnissaralu aallarnerlugu ima issuassaanga:

”Sulinermi aalisarnermut politikikkut qaffasinnerusumik anguniakkat tunngavigisallu, ataani allaqqasut tunngavigineqassapput:

- *Pinngortitamik nuiernermilu piujuaannartitsisinnaasumik atuineq*
- *Aningaasaqarniarnermi eqqarsaatigisassat*
- *Aqutsineq atuisunut pitsaasoq atoruminartorlu*

Aalisarnikkut aningaasaqassutsimut kiisalu inuiaqatigiinni aningaasaqassutsimut tunngassutillit, aalisarnikkut ingerlatsineq makkunangga toqqammavilik aallaavigalugu:

- a. *Inuiaqatigiinni siunertat naleqqutinngitsut ilusilerneru aallaavigalugit, sulisut aaliangersimasumik inissinneqassanngillat, aalisarnikkut ingerlatsinerup ilusaata, aalisarnermi allanngortiterinerit pisariaqartut, suliffinnullu allanut naleqqussakkat, tapersersussavai,*
- b. *Aalisarnermik inuussutissarsiuteqarnerup aningaasanik isaatitsiviusinnaanera pitsanngoraaviginiarneqassaaq, inuiaqatigiit akornanni tunisassiornissamut pituttuisuunngitsunik, tuniniaanermut sammiveqarnerusumik tunngavilimmik ingerlanneqassaaq, tunisassiorneq piujuaannartitsinissaq peqqutigalugu pisariaqartoq eqqarsaatigissanngikkaanni. Tamanna politikikkut kissaatigineqartoq tunngavigalugu isigineqassaaq, inuussutissarsiummi peqassuseq najoqqutaralugu ernianik akitsuusineq aamma/imaluunniit atuisutut akiliuteqartitsisarneq inuiaqatigiinnut toqqaannartumik tapersiissutaasinnaammata.*
- c. *Angallateqarniarnerup tungaatigut naleqqussaasarnermi, aalisarnermik inuussutissarsiuteqartut, sapinngisamik namminneq aningaasaliisuusassapput, taamaammat aalisarnermik ingerlatsineq, inuussutissarsiutip iluani nammineq aningaasanik pisariaqartitanik pissarsisinnaaneq anguniarlugu, naleqquttumik ilusilerneqassaaq.*

- d. *Pisortatigoortumik aalisarnermut aningaasaliissutit, imminut akilersinnaanngitsunut atorneqassanngillat, ingerlatsinermilli sinaakkusiinermi atorneqassallutik, kiisalu aalisarnerup ilusaata piorsarnerani, tunngaviumik piorsaanermi atorneqassallutik.*

Anguniakkanik tunngavinnillu ajunngitsunik qulaaniittunik Aalisarnej pillugu Ataatsimiititaliarsuup 2008-mi suliamik aallartisisup sulinissamut tunngavissaasa ilagisaannik nalilersuilluni suleriaqqinnissaq Naalakkersuisut isumaqatigilluinnarpaat.

Siumup oqallinnissamut tunngavilersuutimini pissutsit ajorluinnartumik ineriartortut suliniutigineqarfiginissaannik partiit tamaasa peqataaqquai.

Ajoraluartumik aaqqiissutissatut siunnersuutituaq pisassiissutinik qaffaanissamik tunngaveqarpoq. Tassunga atatillugu Naalakkersuisut aperissapput:

Taamatut kissaateqarneq peqassutsikkut aningaasatigullu imminut nappassinnaassuseqarnissamut naapertuuppa?

Siunnersuuteqartut oqaatigaat inuppassuit periarfissatuarigaat kommunimut ikioqqullutik saaffigininnissaq. Taamaattoqassappat soorunami ajuusaarnarpoq, pingaartumik sinerissap qanittuani aalisarnermi ukioq manna ukiup siulianut sanilliullugu aningaasatigut isertitat isigigaanni.

Assersuutigalugu oqaatigisinnaavarput 2011-mi sinerissap qanittuani aalisarnermi tunisat nalingi 2010-mut sanilliullugit 74 mio. kr.-nik qaffariarnissaat naatsorsuutigineqarmat. Tassani bonus-itut tunniunneqartartut ilaapput, taakkulu ilaat ukiup naalernerani tunniunneqartussaallutik.

Kisiannili pisassiissutit siornamut sanilliullugu siusinnerusukkut nungullugit aalisarnejarnerat naleqqutinngitsumik aaqqissuussaaneermik takutitsivoq. Tassunga tunngatillugu Naalakkersuisut aperissapput:

Taamaappat aalisarnermik inuussutissarsiornerup aaqqissuussaaneeramik pisariaqartumik allannguinnissaq piffissanngunngila?

Issuaaneq alla:

”Sinerissap qanittuani aalisarnerup nalinginnaasumik ilisarnaatigaa angallatit mikisuullutik naammassisaqarpiarsinnaanatillu. Tamatuma kinguneraa aalisartut piniartullu ilaat ulloq naallugu sulisartup ukiumut akissarsiaanit malunnaatilimmik appasinnerusumik ukiumut isertitaqartarnerat. Qaleralinniarnermi aamma raajarniarnermi pisassiissutit angallatinik malunnaatilimmik ikinnerusunit aalisarnejarsinnaapput, taamaalillunilu ikinnerungaartunik aamma sulisoqarlutik.”

Tassunga tunngatillugu Naalakkersuisut aperissapput:

Pissutsip taassuma 2008-mi politikikkut aningaasatigullu nassuiaammut atatillugu aallaaserineqarnerata kingorna suna allannguutaava?

Naalakkersuisut sukumiisumik nalilersuereerlutik aalisarnermillu suliaqartut qanimut suleqatigalugit pilersaarutinik assigiinngitsunik suliaqarput.

Sinerissap qanittuani qaleralinniarneq pillugu aqutsinermut pilersaarut 2012-mi atuutilersinneqassaaq.

Aalisartut aalisarsinnaanermut akuersissummik pigisaqartut tamarmik akuersissummik pissarsisinnaanermik suli periarfissaqassapput. Piffissami aggersumi aalisarsinnaanermut akuersissutinik nutaanik tunniussisoqassanngilaq, aalisartunut inunnulluunniit sulisunut aalisarnermit isertitaqanngitsunut.

Aalisartut angallat atorlugu aalisartut ukiut arlallit sioqqullugit aalisarsimanertik tunngavigalugu angallatikkaarumik pisassinneqartalissapput. Aalisartut taakku pisassiissutit sukkavallaamik nungullugit aalisarneqarnissaat annilaangassutiginaq tunisassiorfiit qanimut suleqatigalugit aalisarnertik pilersarusiorsinnaalissavaat. Pisassiissutit taakku ingerlatsinerup aningaasalersorneranut aningaasaliissutinullu tunngaviusinnaapput.

Umitsiaararsorlutik aalisartut, aalisartut angallatikkaarumik pisassinneqarnikut unammilleqatiginagit maannakkutut tamanut atuuttumik pisassinneqartarnerat ingerlaannassaaq.

Suliniutit qulaaniittut aaqqissuussaanerup pisariaqartumik allanngortinnissaanut annertunerusumillu aningaasalersuisoqarnissaanut aqutissiuiniartussaapput, tamannalu ukiorpassuarni kissaataasimavoq.

Paasisitsiniaanissaq annertoq maannakkut pilersarusiorneqarpoq, kommuunillu suliamut attuumassuteqartut qanimut suleqatigalugit ingerlanneqassalluni.

Ataatsimut suliniuteqarnissamik peqataaqqusineq Naalackersuisut akuersaarpaat, angusaqarniarlunilu oqallinnissaq qilanaarlugu.

Naalackersuisut periarfissaq una atorlugu kommuunit qinnuigissavaat naalackersuisoqarfiit susassaqartut suleqatiserissagaat, oqallinnermi uani unammilligassat suleqatigiilluni iliuseqarfiginissat anguniarlugu.